



REPUBLIKA E SHQIPËRISË

**AUTORITETI PËR INFORMIMIN
MBI DOKUMENTET E ISH
SIGURIMIT TË SHTETIT**

MUZEU HISTORIK KOMBËTAR

Nr. 898 Prot. Datë 06/12/2018

Nr. 1680/1 Prot. Datë 06/12/2018

MARRËVESHJE BASHKËPUNIMI

Autoriteti për Informimin mbi Dokumentet e Ish Sigurimit të Shtetit (më poshtë AIDSSH),
përfaqësuar nga **Kryetarja, Znj. Gentiana Sula;**

dhe

Muzeu Historik Kombëtar (më poshtë MHK), përfaqësuar nga z. Dorian Koçi, Drejtor

Për të konsoliduar bashkëpunimin tonë në drejtime konkrete;
palët bien dakord të lidhin këtë **Marrëveshje Bashkëpunimi** (më poshtë “**Marrëveshja**”).

Neni 1 Qëllimi

Qëllimi i kësaj Marrëveshje Bashkëpunimi është rregullimi i marrëdhënieve midis palëve për zbatimin e angazhimeve, të projekteve të përbashkëta me fokus promovimin dhe përkujtimin e vlerave, ngjarjeve që dëshmojnë periudhën për krimet e komunizmit në Shqipëri dhe periudhën që ka funksionuar ish-Sigurimi i Shtetit.

Neni 2 Objekti

Objekti i kësaj marrëveshje është institucionalizimi i marrëdhënieve për bashkëpunimin e ndërsjellë të palëve, në kuadër të identifikimit, grumbullimit, administrimit të dokumenteve e të

materialeve arkivore të ish-Sigurimit të Shtetit të periudhës 29 nëntor 1944 - 2 korrik 1991 dhe të organeve të diktaturës komuniste.

Bashkëpunimi në fushën e botimeve, kulturës dhe promovimit të saj, që dëshmojnë periudhën për krimet e komunizmit në Shqipëri dhe periudhën që ka funksionuar ish-Sigurimi i Shtetit.

Neni 3 Baza ligjore

Baza ligjore e kësaj **Marrëveshje** është ligji nr. 45/2015 “Për të drejtën e Informimit për dokumentet e ish-Sigurimit të Shtetit të Republikës Popullore Socialiste të Shqipërisë”, neni 17 i Rregullores “Për Organizimin dhe Funksionimin e Autoritetit për Informimin mbi Dokumentet e Ish-Sigurimit të Shtetit”, miratuar me Vendimin nr.21, datë 09.05.2017 të Autoritetit dhe ligji nr. 27/2018 “Për Trashëgiminë Kulturore dhe Muzetë”.

Neni 4 Të drejta dhe detyrimet e palëve

Në përmbushje të kësaj marrëveshjeje, MHK-ja dhe AIDSSH-ja kanë të drejta dhe detyrime, dhe angazhohen të bashkëpunojnë në fushat e tyre të kompetencës dhe të misioneve të tyre si më poshtë:

- a. grumbullimin e të dhënave, dokumenteve dhe dëshmimeve për njohjen e veprimtarisë së organeve dhe të strukturave të Sigurimit të Shtetit, të formave të persekutimit dhe formave të rezistencës kundër tyre, si dhe të të gjitha veprimtarive, që kanë çuar në dhunimin e të drejtave e të lirive themelore të njeriut në vitet e regjimit komunist;
- b. grumbullimin e të dhënave dhe dokumentacionit arkivor të ish-Sigurimit të Shtetit;
- c. të bashkërendojnë punën kryerjen e studimeve shkencore për rolin dhe funksionin e ish-Sigurimit në shtet dhe në shoqëri, dhe për format e ndryshme të shfaqjes dhe ekzistencës së opozitës dhe kryengritjes ndaj regjimit komunist me qëllim rishqyrtimin historik të veprimtarisë së ish-Sigurimit të Shtetit;
- d. ofrimin e ndihmës studiuesve të institucioneve respektive, që dëshirojnë të bëjnë kërkime shkencore në fushat që ato mbulojnë sipas ligjit;
- e. shkëmbimin e vazhdueshëm të kopjeve të periodikëve që botohen nga dy institucionet, materialet shkencore dhe informative me qëllim promovimin e vlerave historike, në përputhje me interesat e palëve dhe duke respektuar legjislacionin në fuqi.
- f. organizimin e aktiviteteve të përbashkëta që kanë në fokus të tyre krimet e komunizmit në Shqipëri dhe periudhën që ka funksionuar ish-Sigurimit i Shtetit me qëllim njohjen dhe edukimin e publikimit me historinë e tij.
- g. të marrin pjesë në takime të organizuara nga secila palë, për çështje që janë objekt i kësaj marrëveshjeje.
- h. të bëjnë të disponueshëm kundrejt kërkesave dokumente dhe materiale arkivore që i përkasin periudhës së komunizmit me fokus veprimtarinë e sigurimit të shtetit dhe që i nevojiten secilës palë në funksion të veprimtarisë së punës përkatëse në përputhje me legjislacionin në fuqi për arkivat;

- i. të bashkërendojnë punën për edukimin qytetar nëpërmjet garantimit të mundësive për shqyrtimin e dokumenteve të organeve të diktaturës komuniste, duke përfshirë dokumentet e ish-Sigurimit të Shtetit të asaj periudhe;
- j. të organizojnë, hapin ose shkëmbejnë ekspozita që kanë si bazë pasurinë dokumentare apo kulturore në fushat respektive që dy institucionet mbulojnë sipas ligjit;
- k. të organizojnë konferenca, takime, workshope për të nxitur ndërgjegjësimin e të gjithë atyre që u janë përpunuar/ruajtur të dhënat nga ish-Sigurimit i Shtetit, gjatë periudhës së diktaturës komuniste, me qëllimin krijimin e një kulture gjithëpërfshirëse për njohjen e dokumentacionit arkivor të kësaj periudhe.

Neni 5

Koordinimi ndërmjet palëve

1. Në zbatim të kësaj **Marrëveshje**, **AIDSSH** dhe **MHK** do të caktojnë nga një person kontakti.
2. Personat e kontaktit do të mbajnë takime ndërmjet tyre në varësi të nevojës për marrje dhe dhënie të informacioni dhe do të informojnë titullarin e institucionit në lidhje me zbatimin e kësaj Marrëveshje.
3. Komunikimi mes palëve do të jetë në formë zyrtare shkresore, duke mos përfshirë format me të shpejta të komunikimit elektronik.
4. Palët do të njoftojnë reciprokisht në rast se ndryshohet personi i kontaktit.

Neni 6

Përmirësimet, Ndryshimet, Shtesat

1. Palët mund të bëjnë përmirësime, ndryshime dhe/apo shtesa në këtë **Marrëveshje**, bazuar në pëlqimin e ndërsjellë të tyre.
2. Çdo përmirësim, ndryshim dhe/apo shtesë do të bëhet vetëm me shkrim nga titullarët e **AIDSSH** dhe **MHK**, apo nga persona të autorizuar prej tyre dhe do të hyjnë në fuqi pas nënshkrimit të tyre.

Neni 7

Mirëbesimi

1. **AIDSSH-ja** dhe **MHK-ja** do të respektojnë parimin e mirëbesimit të ndërsjellë.
2. Palët duhet të mbajnë në mirëbesim dhe të përdorin sipas fushës së veprimit të gjitha dokumentet, të dhënat dhe informacionet e tjera të shkëmbyera prej tyre në lidhje me këtë Marrëveshje.
3. Vështirësitë e paparashikuara, mosmarrëveshjet ose mospajtimet që rezultojnë nga zbatimimi i kësaj marrëveshje bashkëpunimi do të zgjidhen nëpërmjet bisedave në mirëbesim, me negociata midis Palëve.

Neni 8

Afati i marrëveshjes

1. Kjo **Marrëveshje** do të lidhet për një kohëzgjatje të pacaktuar.

2. Marrëveshja mund të përfundojë nga secila **Palë** nëpërmjet dërgimit të një njoftimi me shkrim **Palës** tjetër, (të paktën një muaj përpara).
3. Në rast të përfundimit të kësaj Marrëveshje, palët do t'u përmbahen detyrimeve që rrjedhin nga kjo Marrëveshje, për sa i përket informacionit të shkëmbyer përpara datës së përfundimit të saj.

Neni 9

Nënshkrimi dhe hyrja në fuqi

1. Kjo **Marrëveshje** hyn në fuqi ditën e nënshkrimit të saj.
2. Marrëveshja është hartuar në Tiranë, në katër kopje origjinale, dy prej të cilave depozitohen në **Autoritetin për Informimin mbi Dokumentet e ish Sigurimit të Shtetit** dhe dy të tjera depozitohen në **Muzeun Historik Kombëtar**.

Për

**Autoritetin për Informimin mbi
Dokumentet e ish Sigurimit të Shtetit**

Gentiana SULA

KRYETARË AUTORITETIT



Për

Muzeun Historik Kombëtar

Dorian KOÇI

DIREKTOR

